

四庫全書

子部

欽定四庫全書

百菊集譜卷四

宋 史鑄 撰

歷代文章

多非全文

屈原離騷經朝飲木蘭之墜露兮夕餐秋菊之落英

王逸注云言旦飲香木之墜露吸正陽之津液暮食

芳菊之落華吞正陰之精藥洪興祖補注曰秋花無

自落者當讀如我落其實而取其材之落又據一說

云詩之訪落以落訓始也意落英之落蓋謂始開之花芳馨可愛若至於衰謝豈復有可餐之味

魏鍾會菊花賦何秋菊之奇兮獨華茂乎凝霜挺歲蕤

於蒼春兮表壯觀乎金商縹榦綠葉青柯紅芒

又見史譜

序引

晉潘尼秋菊賦垂采煒於芙蓉流芳越乎蘭林又曰既延期以永壽又蠲疾而弭疴

晉盧湛菊花賦浸三泉而結根晞九陽而擢莖若乃翠

葉雲布黃藥星羅

晉傅玄菊賦布濩河洛縱橫齊秦掇以纖手承以輕巾
服之者長壽食之者通神

晉嵇含菊花銘曰煌煌丹菊翠蓋紫莖

晉成公綏菊花銘數在三九時惟斯生又有菊頌曰先
民有作詠茲秋菊綠葉黃花菲菲或或芳踰蘭蕙茂
過松竹其莖可玩其葩可服

晉傳統妻菊花頌英英麗草稟氣靈和春茂翠葉秋曜

金華布濩高原蔓衍陵阿揚芳吐馥載芬載葩爰拾
爰採投之醇酒御于王公以介眉壽

晉袁宏菊詩靈菊植幽崖擢穎凌寒飈春露不染色秋

霜不改條

按晉書或作袁山松

附陶淵明九日間居詩并序

余閒居愛重九之名秋菊盈園而持醪靡由空服九

華寄懷於言

愚齋云近年蔡夢弼有注和陶詩其中不注九華為菊名惜其有闕

世短意恒多斯人樂久生日月依辰至舉俗愛其名露

淒暄風息氣澈天象明往鷺無遺影來鴈有餘聲酒能
祛百慮菊為制頽齡如何蓬廬士空視時運傾塵爵恥
虛壘寒華徒自榮斂襟獨閒謠緬焉起深情棲遲固多
娛淹留豈無成

飲酒詩秋菊有佳色裛露掇其英汎此忘憂物遠我遺

世情又云採菊東籬下悠然見南山

此皆陶詩中句

唐宋詩賦

選并詞

此詩不惟選取精妙者或有菊名見諸文集此特取

之以廣識其名或出名公所作雖曰未工此亦取之以見前賢賦詠之大畧覽者當知之

文言

陸宣公

文言曰菊稟陰陽之和氣受天地之淳精又曰不失其時比君子之守節無競於物同志人之不爭又曰行道者象之足以建德立身者取之足以作程又曰春之交夏之候靡木不榮無草不茂我亦抽英而擢秀商之氣冬之時無木不落無草不萎我亦發花而呈姿又曰淳

和自守芳潔自持

秋香亭賦

為鄭屯田作

范文正公

鄭公之後兮宜其百祿使于南國兮鏗金粹玉倚大旆
於江干揭高亭於山麓江無煙而練迴山有嵐而屏矗
一朝賞心千里在目時也秋風起兮寥寥寒林脫兮蕭
蕭有翠皆歇無紅可凋獨有佳菊弗冶弗天采采亭際
可以卒歲畜金行之勁性賦土爰之甘味氣驕松筠香
滅蘭蕙露漙漙以見滋霜肅肅而敢避其芳其好胡然

不早歲寒後知殊小人之草黃中通理得君子之道飲
者忘醉而餌者忘老云云

菊老

元微之

秋叢遶舍似陶家遍遶籬邊日漸斜不是花中偏愛菊
此花開盡更無花

重陽席上賦白菊

白樂天

滿園佳菊鬱金黃中有孤叢色借霜還似今朝歌酒席
白頭翁入少年場

歎庭前甘菊花

杜甫

簷前甘菊移時晚
青蘂重陽不堪摘
明日蕭條盡醉醒
殘花爛漫開何益
籬邊野外多衆芳
采擷細瑣升中堂
念茲空長大枝葉
結根失所纏風霜

晚菊

韓愈

少年飲酒時踴躍
見菊花今來不復飲
每見恒咨嗟佇立
摘滿手行行把歸家
此時無與語棄置奈悲何

九月十日菊

鄭谷

節去蜂愁蝶不知曉庭還遶折殘枝自緣今日人心別
未必秋香一夜衰

白菊

皮日休

已過重陽半月天琅華千點照寒烟藥香亦似浮金靨
花樣還如鏤玉錢

憶白菊

陸龜蒙

稚子書傳白菊開西城相滯未容迴月明階下窻紗薄
多少清香透入來

和令狐相公玩白菊

劉禹錫

家家菊盡黃
梁國獨如霜
瑩淨真琪樹
分明對玉堂
僊人披雪氅
素女不紅妝
粉蝶來難見
麻衣拂更香
向風搖羽扇
含露滴瓊漿
高艷遮銀井
繁枝覆象床
桂叢慙並發
梅粉妒先芳
一入瑤華詠
從茲播樂章

菊

李山甫

籬下霜前偶得存
苦教遲晚避蘭蓀
能消造化幾多力
不受陽和一點恩
生處豈容依玉砌
要時還許上金樽

陶公沒後無知己露濕幽藂見淚痕

菊

羅隱

籬落歲云暮數枝聊自芳雪裁纖蘂密金拆小苞香千
載白衣酒一生青女霜春叢莫輕薄彼此有行藏

華下對菊

司空圖

清香裛露對高齋泛酒偏能浣旅懷不似春風逞紅艷
鏡前空墜玉人釵

對菊

齊己

無艷無妖別有香，裁多不為一作只為待重陽。莫嫌醒眼相

看過，却是真心愛澹黃。

醒眼一作醉眼

商州九月十八日大雪雪後見菊

王禹偁

狼藉金錢撒野塘，幾叢無力卧斜陽。爭偷暖律輸桃李，
獨亞寒枝負雪霜。誰惜晚芳同我折，自憐孤艷襲人香。
幽懷遠慕陶彭澤，且擷殘英泛一觴。

和張少卿白菊吟

邵堯夫

清淡曉凝霜宜乎殿顥商自知能潔白誰念獨芬芳豈
為瓊無艷還驚雪有香素英浮玉液一色混瑤觴

詠菊

魏野
首二

榮雖同雨露晚不怨乾坤五色中偏貴千花後獨尊馨
非慙黍稷採合勝蘋蘩蛺蝶寒猶至鷦鷯靜亦蹲味堪
滋玉鉉光欲奪金罇帶露蘂尤密經霜艷更繁砌蛩親
有路梁鸞識無門辟荔宜求友茱萸好結婚栽培勞婢
僕服食教兒孫易把方先哲難為繼後昆敗莎承亞朶

落葉擁纖根雖異皇家瑞寧辜白帝恩延齡仙訣著應
候禮經言不與羣芳競還如我避喧

白菊

濃露繁霜著似無幾多光采照庭除何須更待螢兼雪
便好藁邊夜讀書

詠菊

王荊公

四首

補落迦山傳得種閭浮檀水染成花光明一室真金色
復似毗耶長者家

城東寺菊

黃花漠漠弄秋暉
無數蜜蜂花上飛
不忍獨醒辜爾去
慇懃為折一枝歸

和晚菊

不得黃花九日吹
空看野葉翠葳蕤
淵明酩酊知何處
子美蕭條向此時
委翳似甘終草莽
栽培空欲傍藩籬
可憐蜂蝶飄零後
始有閒人把一枝

殘菊

黃昏風雨打園林殘菊飄零滿地金折得一枝還好在
可憐公子惜花心

甘菊

司馬溫公

野菊細瑣物籬間私自全徒因氣味殊不為庖人捐采
升白玉堂薦以黃金盤願若南陽守永扶君子年

重九席上觀金鈴菊

韓忠獻公二首

黃金綴菊鈴充地獨馳名

金鈴菊
兖州種

細蘂浮杯雅香簫貯

露清風休沈夜警雨碎入寒聲自此傳仙種秋芳冠玉

京

和崔象之紫菊

紫菊披香碎曉霞
年年霜晚賞奇葩
嘉名自合開仙府
麗色何妨奪錦砂
雨徑蕭疎凌蘚暈
露叢芬馥敵蘭芽
孤標只取當筵重
不似尋常泛酒花

次韻南陽錢紫微盆中移白菊

劉忠肅公摯

晚秋風露下星榆
玉刻圓錢散曉株
人住水涯多白髮

地應花谷近清都
按香漬酒登新譜
益氣輕身載舊圖
移取黃堂朝夕見
北洲亭遠故臺蕪

郡中舊有
白菊臺

希真堂束手植菊花十月始開

歐陽修

當春種花唯恐遲
我獨種菊君勿誚
春枝滿園爛張錦
風雨須臾落顛倒
看多易厭情不專
鬪紫誇紅隨俗好
豁然高秋天地肅
百物衰陵誰暇弔
君看金蘂正芬敷
曉日浮霜相照耀
煌煌正色秀可餐
藹藹清香寒愈峭

高人避喧守幽獨淑女靜容羞窈窕方當搖落看轉佳
慰我寂寥何以報時攜一樽相就飲如得貧交論久要
我從多難壯心衰迹與世人殊靜躁種花不種兒女花
老大安能逐年少

甘菊

蘇東坡

越山春始寒霜菊晚愈好朝來出細藥稍覺芳歲老孤
根蔭長松獨秀無衆草晨光雖照耀秋雨半摧倒先生
卧不出黃葉紛可掃無人送酒壺空腸嚼珠寶香風入

牙頰楚些發天藻新萸蔚已滿宿根寒不槁揚揚弄芳

蝶生死何足道頗訝昌黎公恨爾生不早

退之秋懷詩
鮮鮮霜中菊

既晚何用好揚揚弄
芬蝶爾生還不早

五月園夫獻紅菊

蘇頲濱

三首

黃花九月傲清霜百草滿園無比香紅紫無端盜名字

試尋本草細思量

南陽白菊有奇功潭上居人多老翁葉似皤蒿莖似棘

未宜放入酒盃中

戲題菊花

春初種菊助槃蔬
秋晚開花插酒壺
微物不多分地力
終年乃爾任人須
天隨匕筯幾時輟
彭澤罇罍未遽無
更擬食根花落後
一依本草太傷渠

戲答王觀復酴醾菊

黃山谷

二首

誰將陶令黃金菊
幻作酴醾白玉花
小草真成有風味
東園添我老生涯

戲答王子予送凌風菊

病來孤負鷓鴣杓
禪板蒲團入眼中
浪說閒居愛重九
黃花應笑白頭翁

九月十日菊花爛開

張文潛

蕭條秋圃風飛葉
却有黃花照眼明
已過重陽慵采擷
自嫌亦作世人情

次韻桃花菊

朱行中

名服紹聖初人

籬邊不語自成蹊
紅入秋叢見亦稀
亂插烏巾酬老健
輕浮白酒惜春歸
劉郎一去花何晚
陶令重來色已非

蝶散蜂藏無足恠冷香寒艷不堪依

次韻時從事桃花菊

侯季長

名延慶政
和中人

霜郊百草半青黃寒菊偷春作艷粧灼灼似誇籬下客

天天欲伴禁中郎

退之百葉桃花云
故伴仙郎宿禁中

元都道士聞須種

彭澤先生見定狂莫信化工欺世俗且將一笑薦彫觴

菊

錢昭度

曾見春花落萬紅不然隨雨即隨風如何得到重陽日
浮在陶家酒盞中

次韻十五日菊

丁寶臣
首二

秋香多日閱英華
霜脫離離抱砌斜
趁節不隨時俗眼
近冬真是歲寒花
攜辭舊入騷人筆
載酒誰尋醉令家
曾讀南華齊物論
均無遲速可驚嗟

寒芳開晚獨堪嘉
開日仍逢小雨斜
秋盡亭臺凋木葉
月圓時節伴萸花
幽香不入登高會
清賞終存好事家
黃蘗綠莖如舊歲
人心徒有後時嗟

五色菊

愚齋云孫真人種花法與洛陽花木記皆有此菊名

劉原父

首二

屢聞白雪題詩句飽見黃花泛酒盃
豈似一枝能五色相隨次第雪中開

庭前菊花

翠葉金華刮眼明薄霜濃露倍多情
誰人正苦山中醉借與繁香破宿醒

都勝菊

江表

首三

似嫌春色愛秋光格外風流晚獨芳
淡佇精神無俗艷

豐醲肌骨有天香
玉攢碎葉塵難染
金蹙深心蝶謾狂
曉帶露華初折
贈瑤臺欲識斬新粧

御愛菊

黃花開盡白花開
移自新羅小小裁
雅質似嫌施粉黛
玉肌端是屑瓊瑰
曾叅御側龍顏愛
尚帶天邊月色來
輕著曉霜添嫵媚
看勻紅淺上香腮

五色菊

孤根分斷便成叢
色弄輕黃轉紫紅
愁似斂容羞白日

淡如無語怨西風自緣取賞人心別不許陪觀衆志同
亂折東籬休借問多情誰是主人翁

亞叟惠龍腦菊

許景衡

正色最宜霜後見清香自是藥中珍明年把酒東籬下
采采何如舊主人

梅開踰月而黃菊方爛然

鄭剛中

江梅久矣報塗粉籬菊傲然方鑄金嶺外四時惟一氣
難分冬霧與秋陰

詠菊

汪彥章

依倚西風不自持
歲華羽葆雜金規
繁開不負朝陽色
獨步非關昊帝私
把酒可能追靖節
掇苗終欲慕天隨
春紅過盡聊經眼
賴有芬芳慰所思

十日買黃菊二株

王十朋

三首

十月更十日黃花開滿枝
鮮鮮如可餐
采采還自疑
重陽不堪摘
況後一月期
既晚何用好
茲言聞退之
天然傲霜性
寧問早與遲
不以日月斷
深杯為花持

十月望日買菊一株頗佳

秋去菊方好天寒花自香深懷傲霜意那肯媚重陽

十月二十日買菊一株置于郡齋松竹之間目為

歲寒三友

三百青錢一株菊移置牕前伴松竹鮮鮮正色傲霜性
不逐重陽上醺醖誰云既晚何用好端似高人事幽獨
南來何以慰淒涼有此歲寒三友足

分送四月菊與提刑都運二丈

張孝祥二首

午陰籬落小徘徊
底許清香鼻觀來
定自霜臺風力峻
故教霜菊暑中開

金縷裁衣玉綴裳
掃除瘴暑作秋香
一杯擬做重陽賞
更惜西風一夜涼

贈菊

陸務觀
游二首

花裏風神菊擅名
品流不減晉諸卿
梅應相與有瓜葛
蘭復何憂無弟兄
移後併逢三日雨
開時恰值十分晴

傍籬小摘供囊枕留得殘香夢亦清

陶淵明云三徑就荒松菊猶存蓋以菊配松也予
讀而感之因賦此詩

菊花如端人獨立凌冰霜名紀先秦書功標列僊方紛
紛零落中見此數枝黃高情守幽貞大節稟介剛乃知
淵明意不為汎酒觴折嗅三歎息歲晚彌芬芳

朝天菊

得於婺源愚齋云
此品想藤菊之類

洪景盧邁

但見茶蘼能上架那知甘菊解朝天亭亭秀出風煙上

冷落東籬却可憐

末利菊

洪景伯 适

化工將末利改作壽潭花零露團佳色鵝黃自一家

叢菊

石延年

風勁香逾遠霜寒色更鮮秋天

一作光

買不斷無意學金

錢

菊

陶弼

九月嚴霜殺草根獨開黃菊伴金罇東籬故事何重疊

醉倒花前是遠孫

山行見菊

李鵬

野色芬敷洗露香
籬邊不減御衣黃
繁英自翦無人插
應笑陶潛兩鬢霜

天桃途次見菊

文與可

英英寒菊犯清霜
來伴山中草木黃
不趣盛時隨衆卉
自甘深處作孤芳
其他爛漫非真色
惟此氤氲是正香
却念白衣誰送酒
滿籬高興憶吾鄉

大笑菊

姜特立
二首

玉辦金心磊落花天姿高灑出常葩標名大笑緣何事
開口相逢有幾家

霜後菊

嫩黃醞白媚秋暉正坐清霜一夜飛似怯曉來天氣冷
一時都換紫羅衣

菊苗

彭汝礪
狀元

重陽黃菊花零落殆無有微陽動淵泉嫩葉出枯朽青

青好顏色寂寥霜雪後物理如轉環開花豈其久

種菊

高文虎

菊載神農經不見詩三百周官叙鞠衣一言僅可摘黃
華紀呂令落英餐楚客伯始飲得壽桐君書探賾移根
候萌動需時當甲拆我羨柴桑里敢希履道宅不種兒
女花朱朱與白白閱譜品雖多求栽地恐窄揠苗助其
長抱甕滋以澤朗詠黃為正流播風騷格寒香紫茁蘭
晚節桐柯柏相繼早梅芳一笑巡簷索

愚齋按後漢胡廣字伯始 按本草桐君有採藥錄
註其花葉形色 柴桑乃陶淵明所居之里在九江
潯陽縣 履道坊乃白樂天退老之地在洛
陽按履道新居詩籬菊黃金合窻筠綠玉稠

蠟梅菊次韻周仙尉

聞人善言

臘前曾弄色秋晚更包黃昔認蜂攢蜜今看蝶戀香
輩流雖易處名氏却同鄉會見成功女還思九日觴

金錢菊

楊巽齋

清曉幽叢露作團籬邊積疊喜人看落英欲買真無價
唯許騷人罄一餐

閏月見九華菊

翁龜翁逢龍

衆草已枯霜墻陰獨自芳
旋開三四藥知為兩重陽
酒恰今朝熟花多一月香
又經風雨後得爾慰淒涼

甘菊冷淘

王禹偁

經年厭梁肉頗覺道氣渾
孟春奉齋戒勑厨唯素飧
淮南地甚暖甘菊生籬根
長芽觸土膏小葉弄晴暎
采采忽盈把洗去朝露痕
俸麵新且細漉攝如玉墩
隨刀落銀縷煮投寒泉盆
雜此青青色芳香敵蘭蓀
一舉無孑

遺空媿越盃存解衣露其腹稚子為我捫飽慙廣文鄭

饑謝魯山元

廣文先生飯不足元魯山餓而死

况吾草澤士藜藿供朝

昏謬因事筆硯名通金馬門官供政事食久直紫微垣
誰言謫滁上吾族飽且溫既無甘旨慶馬用品味繁子
美重槐葉直欲獻至尊起予有遺韻甫也可與言

晚食菊羹

司馬溫公

朝來趨府庭飲啄厭腥羶况臨敲扑喧憤憤成中煩歸
來褫冠帶杖履行東園菊畦新雨霽綠秀何其繁平時

苦目痾茲味性所便采擷授厨人烹滌調甘酸毋令薑
桂多失彼真味完貯之鄱陽甌薦以白玉盤舖啜有餘
味芬馥逾秋蘭神明頓颯爽毛髮皆蕭然迺知愜口腹
不必矜肥鮮嘗聞南山陽有菊環清泉居人飲其流孫
息皆華顛嗟予素荒浪強為簪纓牽何當葺弊廬脫略
區中緣南陽丐嘉種時彼數畝田抱甕新灌溉爛漫供
晨餐浩然養恬漠庶足延頽年

采菊圖

王十朋

首二

淵明恥折腰慨然詠式微閒居愛重九采菊來白衣南山忽在眼倦鳥亦知歸至今東籬花清如首陽薇

題徐致政菊坡圖

名壽仁

南方有高士仁義偃王裔家山闢幽坡手取香草藝秋至有黃華采采滿衣袂客來酒盈尊詩出語驚世無心學淵明偶與淵明契靜者年自長頽齡不須制高懷恥獨樂地遠人罕詣丹青寫佳境有目皆可睨吾家鮮鮮徑荒蕪屢經歲儒冠誤此身掛之公得計

桃花菊詞 鷓鴣天

張孝祥

或云康伯可作

一種穠華別樣粧
留連春色到秋光
解將天上千年艷
翻作人間九日黃
凝曉露傲清霜
東籬恰似武陵鄉
有時醉眼偷相顧
錯認陶潛作阮郎

曾端伯慥取友於十花以菊為佳友

口號并調笑令

五柳門前三徑斜
東籬九日富黃花
豈惟此菊有佳色
上有南山日夕佳

佳友金英輳陶令籬邊常宿留秋風一槩推枯朽獨艷
重陽時候賸收芳藥浮卮酒薦得先生眉壽

愚齋云宿留字兩見趙岐注孟子孫奭音
義上音秀下音雷按廣韻宿留傳待也

王龜齡十朋取莊園花卉目為十八香以菊為冷香

有詩
詞

佳節逢吹帽黃金染菊叢淵明何處飲三徑冷香中

點絳脣

霜藥鮮鮮野人閒徑親栽植冷香佳色趁得重陽摘

預約比鄰有酒須相覓東籬側為花辭職古有陶彭澤

毗陵張敏叔繪十花為一圖目曰十客圖其間菊

花曰壽客錢塘關士容因賦詩

詩云莫惜朝衣換酒錢淵明邂逅此

花仙重陽滿杯中泛一縷黃金是一年此詩愚得於士友殊恨其不工今作一絕以易之云

東籬寂寞舊家鄉頭白天生鬚又黃

按本草白菊仙經以為妙用服餌多

用之歲歲相陪重九宴主人傳得引年方

百菊集譜卷四

欽定四庫全書

子部

百菊集譜卷五

詳校官國子監司業臣納麟寶

員外郎臣牛稔文覆勘

總校官庶吉士臣何思鈞

校對官中書臣嵇承志

謄錄舉人臣陳瞻燧

欽定四庫全書

百菊集譜卷五

宋 史鑄 撰

淳祐丙午中夏愚始飭工為此鋟梓越旬餘又得同志陸景昭特攜赤城胡融嘗於紹熙辛亥歲撰圖形菊譜二卷以示所恨得見之晚不及寘于其前今姑撫其要并序續為第五卷云

萬物以節操為高與春俱華與秋偕瘁者盈山滿谷騷

人墨客歌詠乎古今務以句語文辭相誇尚是何足以
浼吾之筆端乎哉吾之所愛者獨菊爾時維季秋霜風
淒緊草木之葉或黃或瘠或槁或脫而菊也方濯濯然
獨立於霜露之中含曜吐穎精采奪目與吾相對竟日
冷淡而耐久瀟洒而有遠韻正可比方高人貞士立於
世道之風波操履卓絕不為威武勢力之所摧屈者矣
夫其天姿高潔獨受間氣生不與草木同流死不與草
木偕逝可謂物中之英百卉之桀然者也云云

菊名御袍乃人君之服故列為首

御袍黃

酴醾

銀荔枝一名太師菊

金荔枝

大金錢

小金錢

添色喜容一名蘸金

七寶黃又名十樣黃

七寶白

金堆

金鈴

大眉心

小眉心

金毬

銀毬

龍腦

桃花

金盞金臺

銀盞銀臺

大白

又名霜下菊

小白

夏佛羅

一名佛頂菊

秋佛羅

甘菊

一名石決

小金荔支

野菊

一丈黃

一名沿籬菊

茉莉

金甌

玉盤

毛心

釵頭金

侍御

蠟梅 一名道衣黃

尖葉白

小堆金

白玉錢

檀香黃

小金佛頭

疊金

大金佛羅

右四十一種 其中亦闕九華

栽植

初種 仲春土膏流動菊苗怒生纔及五六寸掘起揀

根莖大者相去四寸許種之先用麻餅末一大撮拌土

澆灌 一月凡三度鉏薙至日暮以溺澆之春月則用蠶沙一法先以溺漬草屨置土下極有力

摘腦 纔高一尺以上便與摘腦摘腦則杈生而花闊至立秋而止唯夏佛羅銀毬菊不用摘

事實

嶺南異物志云南方多溫臈月桃李花盡坼他物皆先

時而榮唯菊花十一月開蓋此物須寒乃發寒晚故發亦遲

巴東縣將軍灘對岸山水平秀有黃花上下沱一望約五六里

東坡帖曰夏小正以物為節如王瓜苦菜之類驗之略不差而菊有黃花尤不失毫釐近時都下菊品至多皆智者以他草接成不復與時節相應始八月盡十月菊不絕於市亦可怪也黃魯直跋之曰此何異虹

藏不見而虹掛空雷乃收聲而雷發地耶

菊賦

張南軒

敬夫

喻子有園一畝畦菊百本日遊其間乃為之賦其辭曰
西風兮東籬金英兮紫枝著嘉名兮既遠豈衆卉兮等
夷標黃華兮月令寓落英兮楚辭生高崗兮燭隰原吟
鮑照兮賦潘尼互松兮偕杞徑淵明兮宅天隨秋日兮
淒淒秋露兮離離萬木槁兮既下一鴈鳴兮初飛送孟
嘉兮帽落逆王弘兮白衣其操兮箕山之潔其韻兮竹

林之絕濶兮禦寇之御風慄兮馬曹之泛雪臨清流兮
子陵之居瀨含夕霏兮真長之望月孤叢兮特秀幽香
兮微透紫蝶兮黃蜂凜既寒兮猶湊聘芙蓉以為妃兮
命秋蘭以為友官槐斂迹以宵逝兮巖桂容沮而色黝
揖江梅以先發兮曰子之茂兮其庸可後邀黃葵以旅
處兮曰珠玉其在側予豈不知予之陋一束既多兮魏
帝之賜少者百年兮甘谷之壽枝葉老硬兮飽余腹於
五月葩華丰好兮悅余目於重九歲植百本日繞百匝

兮聊臨風而三嗅

杜甫詩以甘菊名石決

秋雨歎詩曰雨中百草秋爛死堦下決明顏色鮮著葉
滿枝翠羽蓋開花無數黃金錢說者以為即本草決明
子此物乃七月作花形如白扁豆葉極稀疎焉得有翠
羽蓋與黃金錢也被蓋不知甘菊一名石決為其明目
去翳與石決明同功故吳越間呼為石決子美所歎正
此花耳而杜趙二公妄引本草以為決明子疎矣哉

百菊集譜卷五

欽定四庫全書

百菊集譜卷六

宋 史鑄 撰

體題新詠

六十一首

以後附入諸士友十九首凡二者之內除於題下該臆吟者八首其他諸篇皆是詠越中所有之品

勝金黃

籬下秋深花正敷
煌煌金彩照吾廬
維揚貢品雖稱貴
顏色看來反不如

御愛黃

貴品傳來自禁中色鮮如柘恍迷蜂作歌亦見鍾情重
承眷應曾遇德宗

御袍黃

秋晚司花逞巧工解將柘色染幽叢待看開向丹墀畔

蕭穎士菊榮宛與君王服飾同杜甫花卿歌綿州副使
篇照曜丹墀也著柘黃注僭乘輿服色

九日黃

露叢花發例皆遲異品敷金不詭隨應節及時真可愛
登高且把泛瑤卮

又

應時寒藥拆秋含晃耀良金色可參似遇道人殷七七
故開佳節日三三

金錢菊

陰陽鑄出遶籬邊露洗風磨色燦然未解濟貧行世上
且圖買笑向樽前

又此作明
用題字

天女將圖買斷秋筭來白帝價難酬金錢滿閣翻嫌富
撒向幽叢竟不收

金絲菊明用
題字

染如艷切人徒染如瑛切金絲色侍女謾歌金縷衣爭似黃

花得天巧織成紋力九切不須機

金鈴菊

化工寫出爛盈枝顆顆光明耀竹籬賞翫佳人應笑道

待教繫向雪獅兒

金連菊

臆吟

迴出嬌紅媚一川
風刀細鏤耀籬邊
不妨捧向孩兒手
留取清香在佛前

側金盞

圓模羅列占東籬
西帝賜來宮樣奇
疑是花神清酌罷
儘教放處不妨欹

金盞銀臺

黃白天成酒器新曉承清露味何醇恰如欲勸陶公飲

西皞應須作主人

又作擬將享宴司花
女須報韋公舊主人

滴滴金

夏菊也

未見秋來花便開人言因露作根荄千團萬點枝頭墜
盡化黃金出土來

密友菊

按洛陽花木記
用此密友字

寒英雅稱伴吾徒色正香清態有餘日涉中國長與會

何憂因數反成疏

楊巽齋密友花有朶朶相迎意
更親之句愚今所作蓋取此義

又蜜卣菊

據高疎察用此蜜卣字

化工也學割蜂房秋卉粧成春藥黃芬馥猶疑盛秬鬯

未容輕把泛霞觴

書洛誥秬鬯二卣正義曰秬黑黍也以此為酒煮鬱金草築而和之使芬

香調暢謂之秬鬯酒卣中樽也

橙菊

上林佳果久流聲

西京雜記云上林苑橙十株

秋徑香苞特假名正

賴蟹肥新酒熟幽人來賞兩含情

荔枝菊

莫論枝上粟團黃且喜籬邊珍
穎香若使唐家妃子見
料應誤摘醉中嘗

茱萸菊

品出陶家花品外名存吳地藥
名中若將泛入重陽酒
不用分香摘兩叢

艾菊

明用
題字

一入陶籬如楚俗重陽重午兩
關情惜哉刪後詩三百

菊奈無名艾有名

一換押鄉字韻云怪底陶籬似楚鄉
寒花暑葉共枝芳無求往古三年効

且挹明朝
九日香

末利菊

明用
題字

來從西域馨香異

蓮經有末利
花香之言

翻作東籬品目新悟此

肯為微利役殷勤來賞屬幽人

王梅溪求末利花詩老
來恥逐蠅頭利故向禪

房覓此花今之
鄙句蓋祖此義

甘菊

南陽佳種傳來久濟用須知味若飴苗可代茶香自別
花堪入藥效尤奇

塔子菊

以金鈴菊蟠結而成

金彩煌煌般若花高蟠層級巧堪誇更添佛頂週遭種

成此良緣勝聚沙

聚沙為佛塔見蓮經偈言

毬子菊

團團秋卉出籬東惹露凌霜袞袞中疑是花神拋未過
更教輾轉向西風

野菊

寒郊露蘂疎仍小

一年野菊甚盛乃改作繁何小

瘦地霜枝細且長境

僻人稀誰與採馬蹄贏得踐餘香

黃白菊

二色秋英併一根金宜為友玉為昆相依笑向西風裏
皓色須還中色尊

十樣菊

臆吟

霜藥多般同一本天教成數殿秋榮從他蛺蝶偷香慣
偷遍無過一例清

九華菊

吳有趙廣信嘗鍊九華丹此菊以丹為名猶醖釀花以酒名之其意各有所寓杜光

庭詩初開九

鼎丹華熟

功成丹鼎花堪比花到重陽色正鮮靖節集中名甚著
羨他慣服制顏年

又

流芳千古傲霜英剪玉絲金照眼明若論駐顏功不小
仙丹端可與齊名

佛頂菊

離畔光明緣底盛秋來千百化身多露棲不必醍醐灌

仁宗皇帝御贊蓮經灌頂醍醐
滴涼醍醐酥之精液也
雨沐何煩手掌摩楞嚴經世尊憐

憇阿難以手摩其頂

大笑菊

丁晉公詩花能含笑笑何人東坡詩花非識面常含笑今愚鄙句亦祖此義

玉顏已破晚秋葩不費千金亦可誇
幽徑主人偏愛惜

且羸耳畔弗諠譁

又

明用題字

晚節敷華性異常黃冠白羽道家粧
料應識破榮枯事

獨對秋風笑一場

又

明用
題字

桃笑春風菊笑秋冶容正色不相侔寒梅一笑如堪索
這笑方為是匹儔

玉甌菊

化工施巧在秋葩琢就圓模瑩可嘉著底香心真蠟色
似留賞客欲分茶

銀盤菊

秋英疑是白金裁承露如從仙掌來翻笑漢皇銅制古

斬新一樣也奇哉

輪盤菊

秋深籬下拆霜英
圓質風吹颺不停
天巧固非煩扁斲
日新又豈待湯銘

粉團菊

月姊容顏別一家
天真何必御鉛華
秋來殘膩方拋棄

幻作籬邊馥馥花

彭齊霜月詩應是姮娥剩粧粉
一時拋撒下天來此借其意

月下白

素質鮮明絕點塵冰輪高照轉精神叢叢皓彩如羅綺
謂彩帛之紋亦箇樣誠堪示染人
有粟地菊之類

纏枝白

西風頓拆晚秋葩色映霜華與月華不特翠枝柔倚
於

切儺乃可切更饒綠葉密交加

酴醾菊

宋景文公酴醾詩來自蠶叢國香傳弱水神按古蠶叢國即蜀中也

春架秋籬景一同想因分種自蠶叢但將酴醾酬佳節
不管花居酒品中

木香菊

秋花也與藥名同
素彩鮮明曉徑中
多少清芬通鼻觀
何殊滿架拆東風

寒菊

不畏霜風質自殊
不招蜂蝶艷何孤
梅花松竹如相見

朱希真十月菊詞須添羅幕
護風霜要留與疎梅相見

便合添為四友呼

淮南菊

割脂簇蠟密成團
傑出東籬最奈寒
加紫翻宜霜後看

料應慣見屬劉安

徘徊菊

花神著意駐秋光不許寒葩陡頓芳
敷彩盤桓如有待幽人把玩不須忙

饅頭菊

離火供炊餅餅圓

陸放翁菊詩有餅餅香字
前輩菊詩離邊餅餅金幽人飽翫

向籬邊採來還問堪餐否應使癡兒口墮涎

桃花菊

仙源分派到籬東灼灼穠華綴露叢崔護詩章陶令酒
兩家混作一家風

燕脂菊

臆吟

天女染花情若狂鮮妍直欲媚秋光忍將陶徑黃金色
也學秦宮朱臉粧

牡丹菊

臆吟

本是秋香九日黃假為國色百花王待殘擬把酥煎嚼

見漁隱叢話後集二十
三卷孟蜀時李昊事

莫採芳英泛酒觴

紅薇菊

臆吟

天厭花黃色改殷

烏閑切赤色也

東籬景物似東山逗遛春藥

為秋藥荆棘了無藏葉間

繡菊

寒葩縷縷結緗紅不待纖針見巧工秋老從他宮線減

彩文翻喜入花叢

石菊

花美雖堪寫團扇艷妖未必入東籬紀名何取它山物

徧問園官總不知

愚辨石菊大菊雖今古之名不同其實一種物也至秋結實名曰蘧麥今

窮見麥粒之形了無所惑矣討論既定竊意其石字當為碩案字書碩大也庶幾意合於古書今復成一絕以

紀其實云

又

幹弱葉纖花特奇艷濃九夏到秋時枝頭結實元為藥

爭奈越中人罕知

若蘧麥所出之地其幹直而堅

大菊

明用題字即今之石菊也

菊名何大為誰開子結秋叢是藥材

若所產之地者若結子乃至作穗

用催生功不小請嘗便可見嬰孩

千金方治產經數日不出或子死腹中以

瞿麥煮濃汁服之

孩兒菊

地母提來風露徑笑風泣露並堪憐品微元乏香肌骨

濫預秋英得浪傳

春菊

蒿菜花是也

莫論園蔬品目卑花開不減菊幽奇燦然金色仍堪採

春老恰如秋老時

紫菊

馬蘭花是也

秋野間花是繡鋪佳名得自北人呼

見本草

若教尼父當

時見應惡紛紛色亂朱

觀音菊

天竺花是也

霞幢森列引薰風高出疎籬紫滿叢翠葉纖纖如細柳

直宜插向淨瓶中

繡線菊

厭草花是也

天成素縷結秋深巧刺由來不犯針籬下工夫何絢爛

條條綰綴紫花心

佳友

昔曾端伯以菊為佳友愚今以詩實其名

氣清色正品尤高好事幽人善與交
開徑何須望三益相陪雅尚在香苞

壽客

近世張敏叔以菊為壽客愚今以詩實其名

東籬冷落舊家鄉性耐風霜氣味長
幾度入來重九宴主人傳得引年方

對菊懷古

靖節先生菊滿園其名獨有九華存東籬若許塵蹤到
佳品須當盡討論

菊花

單題

獨芳三徑屬秋深清致貞姿快賞心解道卓為霜下傑
平生靖節最知音

金絲菊

馮發藻

十首
闕一

纏風綰雨短籬旁織出黃花縷縷黃遙想司花幾仙子
鮮明擬作六銖裳

茱萸菊

一種秋英具兩般摘來浮向酒盃寬
阿誰到得重陽日醉把花枝子細看

夏月佛頭菊

圓英現出端嚴相素瓣染成知見香
必竟白毫破炎毒故教開向夏畦涼

酴醾菊

秋花也與酒齊名三月留為九月英
朶朶露栖明亞雪

還如壓架拆春晴

朝天菊

臆吟

凌霄花豈凌霄去向日葵空向日傾何似幽姿堪對越
也酬洪覆拱高明

桃花菊

怪底玄都花發遲西真著意在霜枝春葩也耐秋風勁
紅雨何愁亂入籬

牡丹菊

秋香剛欲竊天香遙想南陽似洛陽莫道東籬藹聲價
詩人曾擬作花王

孩兒菊

穉叢弱質巧相如曉沁啼痕一雨餘天亦何心鍾愛汝
也呈佳色殢陶廬

采菊

用古人
名賦

和霜旋采黃香嗅與客登高適興時多謝安排滿頭插
相隨何得怨開遲

金鈴菊

孫耕三
首

疑是良工巧鑄成天然顆顆帶黃英
籬邊一任風搖動不學簷前斷續聲

孩兒菊

弱質生成由地母清姿保愛藉園公
花偏嬌嫩葉偏細凝竚籬邊弄晚風

鷺鷥菊

臆吟 此品
嚴州有之

玉羽毵毵剪作花花心挺出傲霜華
恰如未上青天去

且立西風古徑斜

楊妃菊

臆吟

陸希澄

含笑向籬旁花叢似洞房露濃新出浴霜薄淺成粧尚

帶霓裳色猶存輦路香

張全真題明皇太真聯鑣圖詩並轡春風輦路香

故令

千載下還許侑瑤觴

金盞銀臺

許光曾

黃中素表拆秋葩恰似開筵富貴家
晃耀西風深院裏清標不減水仙花

佛頭菊

僧希高

二首

佳卉超凡沐雨開恍如螺髻出山來

世尊肉髻見蓮經與楞嚴經

就

叢更種金蓮菊

闕

大笑菊

寒花也解媚清秋貌似呵呵滿檻稠若使幽王能著眼
何須舉火戲諸侯

金錢菊

僧文行

二首

化工鑄出最光圓間數枝頭不計千滿徑黃花秋富貴

陶公何必苦無錢

大笑菊

遶籬喜色破新愁一粲西風卒未休

穀梁傳注粲然盛笑貌非學

野花留寶靨應嗤楚客獨悲秋

集句詩

史鑄

四十首

鑄兒童時嘗閱東軒膠儒趙公保集句梅詩喜其多有可取今故效顰采擷百家英華為菊成章也

種菊

幽懷遠慕陶彭澤

王禹偁

一畝荒園試為鉏

蘇子由

自種黃

花添野景

謝景山見詩話總龜

幾多光彩照庭除

魏野

菊花

十二首

無艷無妖別有香

僧齊已對菊

知心誰解賞孤芳

陸務觀

淵明

酩酊知何處

王荆公

安得斯人共一觴

謝無逸

二

霜裏鮮鮮照眼明

王十朋

人言此解制顏齡

梅聖俞

憐香擘

破花心

姚揆

酌盡齋中竹葉餅

黃山谷

三

一夜清霜殞物華

蔡杓

寒芳開晚獨堪嘉

丁寶臣

折來嗅了

依前嗅

邵堯夫

不是尋常兒女花

王十朋

四

千金方菊花作枕袋大能去頭風明眼目陸務觀菊詩傍籬小摘供囊枕留得殘香夢亦清

籬菊含風暗度香

余安行

栽多不為待重陽

齊己

愈風明目

須真物

蘇子由白菊

夢寐宜人入枕囊

山谷

五

露叢芬馥敵蘭芽

韓忠獻公

清賞終存好事家

丁寶臣

莫遣兒

童容易折

洪景盧

此花開後更無花

元微之

六

露裛幽花冷自香

釋皎然

藥中功效不尋常

王十朋食蘆

祛風

偏重山泉漬

文保雍

胡廣隨緣却壽長

鄭剛中菊

七

清香裛露對高齋

司空圖

端仗茲花慰老懷

王十朋

欲折一

枝來侑酒

蔡桡

登高能賦屬吾儕

陳後山

八

八月九月天氣涼

李太白

遶欄種菊一齊芳

邵堯夫

好風應會

幽人意

江奎

時去時來管送香

張芸叟

九

不趁盛時隨衆卉

文與可

幽姿高韻獨蕭然

田元邈

別開小

徑連松路

王介甫

常愛陶潛遠世緣

梅聖俞

十

籬菊開時寒有信

王彥霖

幽香還釀客懷清

周麟之

折歸忍

負金蕉葉

張彥實

欲伴騷人賦落英

蘇東坡

十一

菊花有意浮盃酒

汪彥章

秋老霜濃滿檻開

江表

多謝主人

相管領

沈瀛

盡收清致助吟才

張子野

十二

一夜新霜著瓦輕

歐陽永叔

照窗寒菊近人清

聞人善言次韻童恭叔

賸收芳藥浮卮酒

曾端伯

白髮年年不負盟

聞人善言中秋月

黃菊

二十首

黃花漠漠弄秋暉

王荊公

竚立階前香在衣

王性之

正色逢

人何太晚

強幾聖

衰翁相對惜芬菲

白樂天

二

白露黃花自遶籬

羊士諤

幽香深謝好風吹

寇萊公

陶公沒

後無知己

李山甫一作羅隱

歲歲花開知為誰

李頎

三

凡菊詩中言霜露者甚多至於言雨者惟王龜齡嘗稱范文正公有句云半雨黃花秋賞健云

遶籬黃菊自開花

僧洪覺範

開日仍逢小雨斜

丁寶臣菊第三首句

自

得金行真正色

丁寶臣菊第二首句

肯參紅紫鬪紛華

朱希真

四

金英寂寞為誰開

王禹偁

底許清香鼻觀來

張孝祥

籬下先

生時得醉

白樂天

餘風千載出塵埃

王荊公

五

滿園佳菊鬱金黃

白樂天重陽席上

壽質清癯獨傲霜

楊巽齋

且

喜年年作花主

白樂天花前歎

依然相伴向秋光

羅隱菊

六

五行正氣產黃花

杜光庭

不在詩家即酒家

錢易

詩筆酒盃

俱有味

元絳

亦同元亮舊生涯

本朝江為

七

滿地黃花得意秋

良祐闕姓下句浪陪使節赤松遊見於石刻

移來庭檻助

清幽

齊唐

自緣稟性天生異

張齊賢

不與繁華混一流

楊時可

八

籬邊黃菊為誰開

李嘉祐

轉憶陶潛歸去來

高適

插了滿頭

仍漬酒

邵堯夫

且謀歡洽玉山頽

元灋

九

倚風黃菊遶疎籬

彭應求

自有清香處處知

毛友

今日王孫

好收采

鮑容

濁醪霜蟹正堪持

蘇子由

十

金藥繁開曉更清

歐陽修

薄霜濃露倍多情

劉原父

歸田誰

是淵明興

趙嘏

獨遶東籬萬事輕

周紫芝

十一

叢菊疎疎著短籬

僧璉不器

重陽前後始盈枝

文與可

托根占

得中央色

趙宋英見氣候推蒙

不比凡花兒女姿

姜特立

十二

自有淵明方有菊

辛幼安

因人千古得嘉名

韓忠獻

一年好

處君須記

蘇東坡

翠葉金華刮眼明

劉原父

十三

東籬黃菊為誰香

王十朋

不學羣葩附艷陽

蘇澄庵

直待素

秋霜色裏

廖匡凝

自甘深處作孤芳

文與可

十四

香霧霏霏欲噀人

蘇東坡

黃花又是一番新

宋邦永見陶愚園咏史

家舊已開三徑

韓治

直到如今迹未陳

楊巽齋

十五

滿眼黃花慰素貧

山谷

年年結侶采花頻

劉禹錫

要收節物

歸觴詠

張瀨

只許閒人作主人

姜特立

十六

菊花天氣近新霜

陸務觀

節近花須滿意黃

陳後山

陶令籬

邊常留宿

曾端伯

朝來滿把得幽香

蘇子由

十七

東籬九日富黃花

曾端伯

節物驚心祇自嗟

許景衡

盡日馨

香留我醉

王禹偁

銀瓶索酒不須賒

王十朋

十八

斜照明明射竹籬

僧道潛

黃花能與歲寒期

范文正公

人疑五

柳先生宅

周紫芝

消得攜觴與賦詩

鄭谷

十九

黃花弄色近重陽

僧道潛

風拆霜苞細細香

江表

似與幽人

為醉地

陸務觀

隨晴隨雨一傳觴

陳與義

二十

可意黃花是處開

蘇東坡

芝蘭風味合相陪

綦密禮

應須學

取陶彭澤

白樂天

左把花枝右把盃

司空圖

白菊

三首

我憐貞白重寒芳

陸龜蒙

小徑

低叢淡薄粧

蔡柟

謝女黃昏

吟作雪

徐仲車

天然別是一般香

李端叔

二

幽芳天與不尋常

江表

逆鼻渾疑雪亦香

陳後山一作張文潛

把酒

可能追靖節

汪彥章

素英一色

混瑤觴

邵堯夫只此一句取於五言

三

瓊葩燦彩遶籬東

楊巽齋

不怯

清霜更耐風

趙令

淡泞精

神無俗艷

江表

獨高流品蕙蘭中

李璵

黃白菊

胡侍郎二色詩見醉翁談錄

金英鑠鑠擅秋芳

楊巽齋

中有孤叢色奪霜

白樂天

手把數

枝重疊嗅

邵堯夫

兩般顏色一般香

胡侍郎詩紅白蓮花共一塘云

野菊

一簇疎籬有野花

邵堯夫

不應青女妬容華

洪龜父

繁英自

剪無人插

李璵

只有黃蜂趁兩衙

孫仲益

晚菊

青藥重陽不堪摘

杜甫

重陽已過菊方開

邵堯夫

不將時節

較早晚

王十朋

且折霜蕤浸玉醅

蘇東坡

殘菊

節去蜂愁蝶不知

鄭谷

冷香消盡晚風吹

謝無逸

碎金狼藉

不堪摘

陸務觀

空作主人惆悵詩

于武陵一作韋莊

引用唐宋名賢詩句

唐

二十二名 以下人名依集句次第

僧齊己

元微之

釋皎然

司空圖

李白

白樂天

羊士諤

李山甫

李頎

羅隱

李嘉祐

高適

元潭

鮑溶

趙嘏

廖匡凝

劉禹錫

鄭谷

陸龜蒙

杜甫

于武陵

杜光庭

皇宋

七十名

王禹偁

蘇子由

謝景山

魏野

陸務觀

王荆公

謝無逸

王十朋

梅聖俞

黃山谷

蔡桮

丁寶臣

邵堯夫

余安行

韓忠獻公

洪景盧

文保雍

鄭剛中

陳後山

張芸叟

文與可

田元邈

王彥霖

周麟之

張彥實

蘇東坡

汪彥章

江表

沈瀛

張子野

歐陽修

聞人善言

曾端伯

王性之

强幾聖

寇萊公

僧洪覺範

朱希真

張孝祥

楊巽齋

錢易

元絳

江為

良祐

齊唐

張齊賢

楊時可

毛友

劉原父

周紫芝

僧璉不器

趙宋英

姜特立

辛幼安

蘇澄庵

朱邦永

韓治

張灝

許景衡

僧道潛

范文正公

陳與義

綦密禮

徐仲車

李端叔

趙令衿

李鼎

胡侍郎

洪龜父

孫仲益

不記何代

三名

姚揆

江奎

彭應求

愚自丙申迄于甲辰每得菊之一品一目必稽于衆其
言同者然後筆而記之今譜內有六品尚闕其說緣愚
曩嘗一見今畦丁罕種未獲再覈以取其的故也凡九
年間於吾鄉得正品與濫號假名者總四十五種以次
諸譜之後予昨當花時每歲須苦吟體題詩與集句詩
一二十篇以揄揚衆品之清致積稔彌久幾至二百篇

今選百篇濫贅卷尾至此興盡而絕筆矣爾後雖間有
黃薔薇金萬鈴之類始出此二品首見於號地品然愚
類近時吾鄉亦有之年將耄景則顯眼勸於辨眎未容苟簡增入也如有與
我同志者幸為續譜云

百菊集譜卷六

百菊集譜補遺序

前編始成愚乃標之為百菊集譜因同里判簿兆偉伯
見之乃裒以佳名曰菊史續又見古人江奎詩有他年
我若修花史之句高疎寮有竹史之作但鑄才疎識淺
所愧不足聯芳於前賢乃者物色府察盧舜舉諱選錄示
黃華傳近又蒙同志陸景昭假及鞠先生傳今故併行
校正列於補遺卷端戲表此編濫有稱史之名耳肯淳
祐庚戌歲季春吉旦愚齋史鑄顏甫識

欽定四庫全書

補遺序

欽定四庫全書

百菊集譜補遺

晚香堂品類

此除諸譜重複之名

淵明菊

大夫菊

處士菊

三顧菊

黃金盞菊

簇金菊

金箭頭菊

金骨朶菊

黃金帶菊

銀錢菊

玉盤珠菊

玉瓏璫菊

伴梅菊

茶菊

松子菊

金陵菊

江陰菊

江陰白菊

獻歲菊

四季菊

中秋菊

鳳頭黃菊

鬧蛾兒菊

墨菊

其中亦闕
九華之名

欽定四庫全書

百菊集譜補遺目錄

黃華傳

邢良厚撰

鞠先生傳

馬揖撰

雜識

辨疑

詩賦

晚香堂題詠

續集句詩

新詞

正誤

欽定四庫全書

百菊集譜補遺

宋 史鑄 撰

黃華傳

廣信邢良孚

黃華字季香世家雍州隱于山澤間生男曰周盈曰延年女曰節女皆為神農氏之學歲久苗裔散處天下有黃氏白氏金錢氏金樓氏凡七十餘族而黃氏最顯華少時取青晚節取紫初為內黃令

九域志北京大名府有內黃縣嘗開

卷讀易至黃中通理粲然笑曰美在其中暢於四支矣
至滎滿而歸南遊楚屈大夫方與江離杜蘅及公子蘭
作離騷之辭得華喜同臭味把玩不數楚人歌之曰有
美屈平兮洵潔且清兮咀華之英兮挹我謂我馨兮呂
不韋著春秋聞華名氏援筆特書然華靜介自立不能
媚俗好至魏文帝時嘗徵華入見神采英發帝喜語鍾
繇曰黃華函乾坤之淳和體芬芳之淑氣宜侍宴金華
殿人亦未甚愛也晉陶淵明曠達有高尚之氣然且見

華俯加採納曰吾不肯折腰對督郵今為吾子折腰與

語有味

黃菊味甘

華曰吾甘心從先生遊餘子苦口

白菊味苦

何

足置齒牙間哉淵明迺翦茅開徑延置家園觴詠陶寫

必訪華東籬下握手至熏夕淵明醉眠遣客罷休

罷部買切

華獨露坐不去瓶罄樽空相對悠然江州刺史王弘聞

淵明有佳客亟遣白衣致餽淵明貯酒滿船

船謂酒舫

命華

拍浮其中以為樂淵明有友徂徠十八公與華齊名蒼

髯長身嘗從大夫之後下膏澤有醞藉

膏謂松脂可以釀酒能製

中山醇醪

酒經曰醪汁滓濁酒也東坡松醪賦云製中山之松醪愚按中山在西京以北定州之地

東坡帥定武日嘗飲此酒作賦華譏其非聖人之清十八公曰我自用

我家法卿自用卿家法

二句出世說子嵩云

或問其所以同華

曰陶先生自拔於流俗十八公不彫於歲寒華雖當青

女降霜亦不變色

淮南子秋三月青女乃出以降霜雪高誘注青女天神青嫫玉女主霜雪

嫫乙驕切愚覽漁隱叢話與高續古緯略並引作青腰玉女

是則同時人目為三傑

華既經淵明稱賞名聲表表每遇良辰賓朋登高開宴

華至天資中正非梔貌蠟言

梔貌蠟言出柳文鞭價說

黃衣黃裳意

象間雅清風徐來德馨襲人至其晚節不與草木俱腐
羣英掃地華獨固蒂歸存曰予自上世以來曉輕身明
目之術書名方冊世以為仙且其所居有潭水飲之能
制頽齡於華可知矣子孫枝分傲晚冰霜挺有風烈與
黃橙陸吉同時東坡有黃甘陸吉傳以為一年好處人到于今稱
之

贊曰有煩黃華淵乎似道朱紫競時惟華獨也正羣英
牢落惟華獨也在莊子德充符受命於天唯舜獨也
也正受命於地唯松栢獨也在又遇

騷人達士著語品題名譽始益光大雖今古常見而風
采常新揚子雲曰無仲尼則西山之餓夫與東國之紂
臣惡乎聞非衡言也

左哀二十四年是衡言也戶快切謂過謬之言

夫遇與不

遇人物之顯晦繫焉予於黃華亦有感於斯云

鞠先生傳

建陽馬揖

先生名鞠字華其先為甘氏祖曰節華佐神農著本草
書成帝用嘉之乃命竹史差次其功封以沃土位在上
品之上既而歸隱于南陽潭之山谷世濟其美人多壽

考黃帝嗣興有土德之瑞色尚黃數用九帝曰爾世有大功于民就錫汝以南陽之土賜姓黃氏世世相承以九月九受封之日為先生壽名曰嘉節先生明德惟馨操履貞介恥與庶類競逐繁華雅志清高務堅晚節雖青女橫陳而正色不變王公貴人慕其風味爭相迎致然氣類不相合則雖強留納交而先生終不屑意惟田園守拙之士巖谷隱逸之人事之惟謹即與傾蓋定盟盃酒不相舍先生雖潛德不耀然呂令之正四時成周

王后服飾之用先生與有力焉所知已者楚有靈均晉有淵明本朝有韓稚圭皆與結好為平生歡近時番禺崔公寧辭相印不拜自號菊坡而甘心相與徜徉於其所其見貴重於世如此若昔陶隱居陸天隨諸子升堂矣而未入於室也每歲九日上自宮掖下至閭巷各稱豐儉為先生壽白衣送酒漢宮開釀太官賜饌或獻菜囊或薦蓬餌或烹桑苧之茶皆為先生之侶也且貴為天子如唐德宗亦作為歌詩以慶之至於醉卧籬東反

我籬西此又各隨所寓而稱壽者也其本支百世子孫
千億散而之四方者不知其幾若夫族類大略則有范
成大諸家之譜在茲不復錄

太史公曰先生肇分茅土皆倣其方之色鞠自啓國南
陽之後居湘灘彭澤者二千祀不易黃姓自餘散處四
方者考其氏而知其方若白氏紅氏則著於西南或言
朔庭有墨子墨者又衆色之後此近世方有然未嘗與中國盟會故名
不顯其在青社者有蒼藍二氏生亦不蕃要之南陽實

在中土而黃氏又居方之正得數之中其後宜莫與京
白受采土生金又當金天御宇之時宜白之盛亞於黃
彼朱者子信美矣而有富貴濃艷之態不類山林有道
者氣象君子尚論盍謹考哉

雜識

胡少瀾菊譜序云嘗試述其七美一壽考二芳香三黃
中四後彫五入藥六可釀七以為枕明目而益腦功
用甚博神農所以載之上經姬公所以列之爾雅屈

大夫所以食其英而著之離騷呂不韋所以覩其華而編之月令黃鵠下太液武帝形之歌九月九日漢風俗以為酒自後胡廣袁隗諸人則取其水以為飲食仙人王子喬與陶洪景輩至啖其根葉考其源流蓋自上古已知貴重今人但言陶淵明所好殆不得專其美也云云

按西京雜記武帝歌曰黃鵠飛兮下建章金為衣兮菊為裳

胡少淪菊譜後序云子胡子既作菊譜客曰菊之品不一而足然則花之似菊者吾子亦有取乎曰夫疑似

之間毫釐之際君子明辨而不恕正以其似是而非
有以害道若陽虎之貌似夫子項羽之瞳子如舜其
可以形似而遽信之今菊之為物挹之馨香餌之延
齡標致高爽如此自餘小草僅可為臣僕奴隸詎敢
望其音影花雖相近乃菊之盜猶小人之效君子非
不緣飾其外而胷中之不善詎能自揜余懼夫人他
日之耳目或為所惑故以其黨類列之編末

桐蒿花
滴滴金

地丁花
千里光

馬蘭
旋復花

今觀草堂詩餘其中鷓鴣天桃花菊詞有云解將天上
千年艷翻作人間九日黃愚謂此二句用字皆未深
穩又檢康伯可詞乃作換得人間九日黃且換得二
字用之亦未切當及覈張狀元長短句方知是偷將
天上千年艷染却人間九日黃至此意義明白乃知
下字之工妙

劉蒙譜菊有順聖淺紫之名愚按皇朝嘉祐中有油紫
英宗朝有黑紫神宗朝色加鮮赤目為順聖紫蓋色

得其正矣

詳見
塵史

辨疑

按本草與千金方皆言菊花有子愚初以此為疑今觀
魏鍾會菊華賦其中有芳實離離之言必可取信續
又見近時馬伯升菊譜有該金箭頭菊其花長而末
銳枝葉可茹最愈頭風世謂之風藥菊無苗冬收實
而春種之據此二說則知菊之為花果有結子者明
矣

菊花多真假相半難以分別其真菊花蒂子黑而纖若

野菊則蒂子有白茸而大味極苦

博聞新錄

夏菊越人名為滴滴金愚觀胡氏譜乃以此品為菊之盜蓋因此種枝葉與諸菊不類又至於手撚嗅之絕無其香故胡譜遺之不取愚今之為譜輒反取之者何乃是徇俗泛愛其名耳信此似是而非者也

詩賦

菊華賦

魏鍾會

何秋菊之可奇兮獨華茂乎凝霜挺歲蕤於蒼春兮表
壯觀乎金商延蔓蓊鬱緣坡被崗縹緗綠葉青柯紅芒
芳實離離暉藻煌煌微風扇動照耀垂光於是季秋九
月九日數并置酒華堂高會娛情百卉凋瘁芳菊始榮
紛葩韡曄或黃或赤圓華高懸準天極也純黃不雜后
土色也早植晚發君子德也冒霜吐穎象勁直也杯中
體輕神仙食也乃有毛嫱西施荆姬秦嬴妍姿妖艷一
顧傾城擢纖纖之素手雪皓腕而露形仰撫雲髻俯弄

芳英

愚齊云今諦玩此賦乃知茲菊非尋常之品必是異
於衆者蓋其中有云延蔓翳緣坡被崗則知此菊
之有藤也又云芳實離離暉藻煌煌則知此菊之結
子也又云圓華高懸準天極也則知其幹之高決非
低小之叢此品必是
世謂一丈黃者也

寒蜂採菊藥詩

耿漳

唐人

遊颺下晴空尋芳到菊叢帶聲來藥上連影在香中去
住霑餘霧高低順過風終慙異蝴蝶不與夢魂通

和洪教菊

古風

林少穎

陶令遺世情尚餘愛菊念菊亦有可愛愛之苦不厭我
觀傲霜枝真金赴烈焰道韻輕園綺孤標敵鉞奄配以
靖節名萬古不為忝况茲中央色獨許此君占凝然端
正姿不受紅紫艷草木吾味同世情那得染璀璨歸來
辭斯言了無玷全文於此有四韻今節之偶亦愛此花秋來朝暮饜
富貴兩浮雲天地一旅店是中論饑飽本自無贏欠便
擬學淵明奈此才不膽菊資三徑荒酒須十分灑待讀
悠然句乃無雍徹僭但論廣文詩瘡愈不須砭

菊花

劉子翬

芳叢馥郁早抽芽
金蘂爛斑晚著花
檻小移時爭翦鬱
地寒開意少榮華
輕烟細雨重陽節
曲徑疎籬五柳家
比得春蘭休競秀
且供幽客泛流霞

晚香堂題詠

馬揖伯升

愛菊

愛菊吟詩興不窮
平生事業在其中
成名縱未為詩將
立傳猶堪號菊翁

對菊

淵明長醉屈平醒採菊
食英得趣深野老對花醒復醉

不同時世却同心

賞菊

花品甚富
四時相繼

時時載酒過籬邊無日無花到眼前
清賞不須論九日
一年長是菊花天

友菊

雨餘深院香猶在霜後疎籬色倍明
臭味相投吾與汝

不隨時世變枯榮

茹菊

雨餘采撷供晨饌亂簇冰盤翠欲流勝友過從休失笑

山居只此當珍羞

淵明菊

單葉白花一名晉菊花之豐腴
倍於他菊一幹一花潔白鮮明

一叢瀟洒向寒榮曾結柴桑社裏盟貞白魁奇無附麗

固應千載擅芳名

愚齋云一說淵明
菊乃黃色而細者

大夫菊

細葉黃花花可入藥苗
亦可茹即今之甘菊也

此花獨抱清高趣人爵安能浼得渠喚作大夫君識否
餐英想自楚三閭

處士菊

多葉白花豐潔而間淡世謂之處士
白又有所謂處士黃者花小而繁

皎皎貞芳雅淡容瀟溪推許一何公名標隱逸非無意

為有脩然林下風

濂溪先生周茂叔愛蓮說
云菊為花之隱逸者也

伴梅菊

多葉白花
獨殿於衆菊

雪蘂霜枝本異花同時一一殿年華誰移五柳先生宅
來傍孤山處士家

金錢菊

多葉黃花大如折二錢

一徑黃花伴隱居
圓如鵝眼大如榆
山翁潤屋惟資汝
張武還知有此無

黃金盞菊

千葉黃花大如折二錢細葉相比頗類笑靨兒但中陷而外突耳

九日黃花有意開
也應知道白衣來
先生必向花前醉
故遣花神為捧盃

小金鈴菊

葉類茶菊叢低枝密金色圓花大如筋頭累累相比聚於葉端

時當少皞嚴申令
故遣金鈴報晚秋
寂寂千林正搖落

似將木鐸振衰周

萬鈴菊

花類佛頭黃而豐腴叢高
大而扶疎色鮮明而光采

金風鑄出晚秋英造化鑪中巧賦形飛鳥欲來還又去

似疑有許護花鈴

玉盤珠菊

多葉白花中數小葉合而為心
如珠之圓宛若盤心之承珠也

月斧修成玉一團籬邊清潤逼人寒花心擁出驪龍寶

一顆盈盈欲走盤

茶菊

黃色細花花心有芒本草云菊一種紫莖氣
香而味甘美葉可羹者為真菊即此是也

靈種初非來北苑仙根却自出南陽且同陸羽烹春雪
未許淵明把酒觴

鬧蛾兒菊

細葉淡黃花一花不過三四葉葉各相向如蝶拍之狀聚於枝梢栩栩然若將

飛舞也

花神巧剪鬧蛾兒春去飄零無處歸尚有寒枝香信在
故應撲撲滿園飛

墨菊

出於荆庭近世方有

獨抱緇衣對曉寒天然清淡惡華丹多因元亮題詩筆

洒在寒枝濕未乾

對菊有感

矍鑠山翁志未衰
生平惟菊供襟期
清標慣與霜為敵
貞節不求春見知
把酒相忘陶栗里
採苔同調陸天隨
浮榮過眼真堪笑
秋晚論交更有誰

白菊

寒香獨立向吾廬
風采精神與衆殊
細琢水晶成格範
巧裁雲母作肌膚
霜凝葉瓣疑何厚
露滴花心認却無

縱使雜居流品內知君浩浩不能汙

紫菊

紫府羣仙衣紫霞却嗔素節不繁華移將西掖三秋色
散作東籬九日花荷橐旁觀難入社茱囊相與是通家
靚莊麗服還同調莫向西風立等差

鑄淳祐壬寅之夏嘗序菊譜刊梓以便夫觀覽越數
年忽得晚香堂百詠開卷伏讀則知馬君先輩酷愛
此花無日而不以為樂亦嘗作譜於淳祐壬寅之秋

愚味其詩立意清新造語騷雅體題明白世所未有也第愧鑄耄拙非才不足追攀英躅又不識隱君燕逸何方與吾鄉限隔江山幾許里而獲聞賢士君子志同道合如此登堂拜面其願莫遂實勞我心今姑撫二十篇附于右將以益衍其傳云

續集句詩

史鑄
二十首

種菊

春初種菊助盤蔬

蘇子由

益氣輕身載舊圖

劉摯舊圖謂本草也終

藉九秋扶正色

鄭剛中

芳時偷得醉工夫

白居易

菊花

五首

不受陽和一點恩

李山甫

不嫌青女到孤根

盧彥德見盛山集

年

年歲歲花相似

劉庭芝見詩話總龜

誰為陶潛買酒樽

陳元老見城山詩集

二

粲粲秋香雨露葩

趙宋英

天教晚發賽諸花

劉禹錫

輕烟細

雨重陽節

劉子翬

且盡芳樽戀物華

杜甫

三

漸覺西風換物華

朱升見宋百家詩續選

秋叢逸舍似陶家

元微之

世人若覓長生藥

古道情詩下句只這灰心是大還

百草枯時始見花

歐陽永叔

四

代謝相因寒事催

趙宋英

繞籬疎菊又花開

許渾

霜晴日淡

虛庭裏

葛吏部見歸愚集

多少清香透入來

陸龜蒙菊

五

不是餐英泥楚騷

吳莘見寒綠詩集

重陽菊蕊泛香醪

宋白尋常

不醉此時醉

邵堯夫

陶令拋官意獨高

葉夢得

黃菊

九首

百卉千花了不存

陸務觀

獨開黃菊伴金樽

陶弼

欲知却老

延齡藥

歐陽永叔

誰信幽香是返魂

東坡

二

菊是去年依舊黃

南唐後主李煜上句
鬢從今日添新白

風從花裏過來

香

關上句水向
石邊流出冷云

杯中要作茱萸伴

葛吏部乃丞
相邲之父

更領

詩人入醉鄉

胡曾

三

白酒新熟山中歸

李白風雅韻作新熟碑本作初熟

黃花漠漠弄秋暉

王荆公

東籬採菊隱君子

王十明

醉覺人間萬事非

失記名上句霜

柑糟蟹新醅熟

四

汪彥章菊詩歲

羽葆層層間彩金

姜特立

醉來不厭遶叢吟

賈島滿頭且應

良辰插

韓忠獻公

不插滿頭辜此心

王荆公

五

籬外黃花菊對誰

嚴武附杜甫詩集

應知彭澤久思歸

王禹偁有

花堪折直須折

李詩見杜牧樊川集杜秋娘詩註

新酒初筍蟹正肥

趙端

行見高疎寮跋西里詩稿

六

第三句亦可作今朝有酒何妨醉但不知何人所作

無限黃花簇短籬

蘇子由

幽香深謝好風吹

寇平仲

勸君終

日酩酊醉

李賀

莫待無花空折枝

李詩

七

花裏風神菊擅名

陸務觀贈菊見茶蘼庵集

綠枝黃蘂有高情

張嶠字巨

山詩人不悔衣霑露

范希文

步入芳叢脚自輕

王之道見相山居士

集

八

幸無風雨近重陽

僧法顯見游丞相諱侶序適庵詩集

折取蕭蕭滿把黃

崔德符

酒面浮英愛芬馥

梅聖俞

銀觥須引十分強

李清臣

九

不與羣芳競

魏野

宜乎殿顓商

邵堯夫

露從今夜白

杜甫

菊是

去年黃

南唐李後主

九日陶公酒

陳襄字述古

一生青女霜

羅隱有

同高士操

王之道
字彥猷

得爾慰淒涼

翁龜翁

白菊

玉攢碎葉塵難染

江表

露濕香心粉自勻

朱喬年見
曼玉集

一夜

小園開似雪

朱貞白

清香自是藥中珍

許景衡

野菊

二首

熠熠溪邊野菊黃

東坡

風前花氣觸人香

邵堯夫

可憐此地

無車馬

韓退之

掃地為渠持一觴

陸放翁

二

野花無主為誰芳

陸務觀

酒熟漁家擘蟹黃

山谷詩句

遇酒逢

花須一笑

山谷詞句

故留秋意作重陽

陳後山

晚菊

節過霜風袞袞來

許景衡

菊花寂寞晚仍開

劉滄

誰云既晚

何用好

王十朋

為我殷勤送一杯

白樂天

殘菊

天地方收肅殺功

陸務觀拒霜花

菊枝傾倒不成叢

陸務觀九月晦日

碎金狼藉不堪摘

陸務觀殘菊

圖得人知色是空

僧詠花上句朝開

暮落緣

何事云

引用唐宋名賢詩句

其名已具八前
編者今不再具

唐

名九

許渾

李後主

胡曾

賈島

嚴武

李錡

李賀

韓退之

劉滄

皇宋

二十一名

劉摯

盧彥德

劉庭芝

陳元老

劉子翬

朱弁

葛吏部

吳莘

宋白

葉夢得

陶弼

趙端行

張嶠

王之道

僧法顯

崔德符

李清臣

陳襄

翁龜翁

朱喬年

朱貞白

詞

瑞鷓鴣

按前人所作有以平聲字起或有以仄聲字起二者皆通

詠桃花菊

史鑄

底事秋英色厭黃
喜行春令借紅粧
謝天分付千年品

特地攬先九日香

此花八月半開愚先以千年對三徑緣三字是平聲不叶宮調故改作九

日但犯前賢已用之對

陶令駭觀須把酒崔生瞥見誤成章蜂情

蝶思無迷了採藥還如媚景忙

正誤

省郎史正志

省當作侍曾為建康留守

集句詩宋邦永

宋當作朱

跋纈眼

本作老眼

胡融譜夏佛羅秋佛羅大金佛羅

此三品即佛頂菊也其羅字當作螺蓋佛

頂乃天生肉髻捲螺
髮其菊心頗類之

塔子菊高蟠層級巧堪誇

巧堪誇可改
作簪簪牙

大笑菊不費千金亦可誇

可改作百媚千金不足誇
亦可作誰把千金競好奢


饅頭菊

前編可改云離火供炊餅餅圓幽人餐飽向
籬邊摘歸間與癡兒說也使心懽口墮涎

石菊花瓣五出或有名為千葉者其實十餘瓣也有深

紅粉綠者

此品花瓣上下各一色向上一邊深紅色向
下一邊白色其上面粉綠乃接下色也



百菊集譜補遺